


弥勒菩萨所问经论

卷一

二百十九  
傳一

48949



元祿九年丙子二月日重脩

皇圖鞏固 帝階綴昌

佛日增輝 懋輪常轉

山城州天安寺法金剛院置



彌勒菩薩所居經論卷第一

傳

元魏菩提留支譯

如是我聞一時婆伽婆住王舍城耆闍崛山中與大比丘衆千二百五十人俱并諸菩薩摩訶薩十千人等爾時彌勒菩薩摩訶薩即從座起偏袒右肩右膝著地合掌向佛白佛言世尊我今欲以少法問於如來應正遍知不審世尊聽許以不爾時世尊告彌勒菩薩摩訶薩言彌勒隨汝心念問於如來應正遍知我當爲汝分別解說令汝心喜爾時彌勒菩薩摩訶薩白佛言世尊如是願樂欲聞世尊諸菩薩摩訶薩畢竟成就幾法不退阿耨

多羅三藐三菩提於勝進法中不退不轉行  
菩薩行時降伏一切諸魔怨敵如實知一切  
法自體相於諸世間心不疲倦以心不疲倦  
故不依他智速疾成就阿耨多羅三藐三菩提  
爾時世尊告彌勒菩薩摩訶薩言善哉善哉  
彌勒汝今乃能問於如來如是深義佛復告  
彌勒菩薩摩訶薩言汝今應當一心諦聽吾  
當為汝分別解說如是深義即時彌勒菩薩  
摩訶薩白佛言世尊如是願樂欲聞佛復告  
彌勒菩薩摩訶薩言彌勒若諸菩薩摩訶薩  
畢竟成就八法不退阿耨多羅三藐三菩提  
於勝進法中不退不轉行菩薩行時降伏一

切諸魔怨敵如實知一切法自體相於諸世  
間心不疲倦以心不疲倦故不依他智速疾  
成就阿耨多羅三藐三菩提何等爲八彌勒  
所謂諸菩薩摩訶薩成就深心成就行心成  
就捨心成就善知迴向方便心成就大慈心  
成就大悲心成就善知方便成就般若波羅

蜜彌勒云何諸菩薩摩訶薩成就深心彌勒  
若諸菩薩摩訶薩聞讚歎佛及毀訾佛其心  
畢竟於阿耨多羅三藐三菩提堅固不動聞  
讚歎法及毀訾法其心畢竟於阿耨多羅三  
藐三菩提堅固不動聞讚歎僧及毀訾僧其  
心畢竟於阿耨多羅三藐三菩提堅固不動

彌勒如是諸菩薩摩訶薩畢竟成就深心彌  
勒云何諸菩薩摩訶薩成就行心彌勒若諸  
菩薩摩訶薩遠離殺生遠離偷盜遠離邪淫  
遠離妄語遠離兩舌遠離惡口遠離綺語彌  
勒如是諸菩薩摩訶薩畢竟成就行心彌勒  
云何諸菩薩摩訶薩成就捨心彌勒若諸菩  
薩摩訶薩是能捨主是能施主施諸沙門及  
婆羅門貧窮乞丐下賤人等衣食卧具隨病  
湯藥所須之物彌勒如是諸菩薩摩訶薩畢  
竟成就捨心彌勒云何諸菩薩摩訶薩成就  
善知迴向方便心彌勒若諸菩薩摩訶薩所  
修善根謂身口意業皆悉迴向阿耨多羅三

藐三菩提彌勒如是諸菩薩摩訶薩畢竟成就善知迴向方便心彌勒云何諸菩薩摩訶薩成就大慈心彌勒若諸菩薩摩訶薩畢竟成就大慈身業畢竟成就大慈口業畢竟成就大慈意業彌勒如是諸菩薩摩訶薩畢竟成就大慈心彌勒云何諸菩薩摩訶薩畢竟成就大慈心彌勒若諸菩薩摩訶薩畢竟成就不可譏訶身業畢竟成就不可譏訶口業畢竟成就不可譏訶意業彌勒如是諸菩薩摩訶薩畢竟成就大悲心彌勒若諸菩薩摩訶薩畢竟成就不可譏訶身業畢竟成就不可譏訶口業畢竟成就不可譏訶意業彌勒如是諸菩薩摩訶薩畢竟成就方便心彌勒若諸菩薩摩訶薩善知世諦善知第一義諦善知二諦彌勒如是

諸菩薩摩訶薩畢竟成就善知方便  
彌勒云何諸菩薩摩訶薩成就般若波羅蜜  
彌勒若諸菩薩摩訶薩如是覺知依此法有  
此法依此法生此法所謂無明緣行行緣識  
識緣名色名色緣六入六入緣觸觸緣受受  
緣愛愛緣取取緣有有緣生生緣老死憂悲  
苦惱如是唯有大苦聚集彌勒此法無故此  
法無此法滅故此法滅所謂無明滅則行滅  
行滅則識滅識滅則名色滅名色滅則六入  
滅六入滅則觸滅觸滅則受滅受滅則愛滅  
愛滅則取滅取滅則有滅有滅則生滅生滅  
則老死憂悲苦惱滅如是唯有大苦聚集滅

彌勒如是諸菩薩摩訶薩畢竟成就般若波  
羅蜜彌勒是名諸菩薩摩訶薩畢竟成就八  
法不退阿耨多羅三藐三菩提於勝進法中  
不退不轉行菩薩行時降伏一切諸魔怨敵  
如實知一切法自體相於諸世間心不疲倦  
以心不疲倦故不依他智速疾成就阿耨多

羅三藐三菩提

佛說此經已彌勒菩薩摩訶薩及餘諸菩薩  
摩訶薩比丘比丘尼優婆塞優婆夷天龍夜  
叉乾闥婆阿脩羅迦樓羅緊那羅摩睺羅伽  
人非人等一切大衆聞佛所說皆大歡喜信  
受奉行

彌勒菩薩摩訶薩所問經論

歸命彌勒世尊問曰何故如來說此脩多羅  
荅曰捨等四句示現施戒修行相三種功德  
是菩薩外道聲聞辟支佛共法深心等四句  
示現即彼四法唯菩薩行不與外道聲聞辟  
支佛共是故如來說此修多羅布施示現施

功德遠離殺生等示現戒功德慈悲等二句  
示現修行功德此義云何有外道凡夫離善  
知識不聞正法不善思惟不如說行故妄執  
常見等能集業因諸結使等相依有力增長  
世間因故堅著妄執決定成就世間因故離  
實諦見故無利益他心故貪著世樂故彼諸

外道雖有施等善根種子以疑悔故愛水潤  
識住五取陰地無明土覆時節和合能生識  
芽次第增長成世間果又聲聞辟支佛人親  
近善知識從已渡生死海欲渡生死海人聞  
說世間過患復自少見厭世間苦樂涅槃樂  
欲捨世間追求出道雖不取施等功德而亦  
不離施等功德能伏煩惱得上勝法以是義  
故雖復修習施等善法以無四法故不得大  
菩提又菩薩人畢竟具足成就八法建立大  
事荷負重擔親近真善知識深見世間過患  
知涅槃寂靜爲衆生故不厭世間苦初發菩  
提心不失因故深心成就捨自身樂爲利益

衆生故修行施等功德迴向大菩提依方便  
力增長微少施等功德能護自身不墮聲聞  
辟支佛地以究竟成就般若波羅蜜故能清  
淨施等功德令住菩薩道示現深心等四句  
能攝取施等四句爲菩薩不同法能得一切  
種智是故如來說此修多羅

問曰復以何義如來說此修多羅答曰爲遮  
無因顛倒因隨順正因果是故如來說此修  
多羅此義云何言不退阿耨多羅三藐三菩  
提者以深心成就故此名何義以諸菩薩摩  
訶薩見法界時即得永離菩提心障謂身見  
等一切煩惱出過聲聞辟支佛地入菩薩位

起於初地菩提之心不失因故證得深心是  
故名爲不退阿耨多羅三藐三菩提又言不  
轉者以證勝法故此名何義以成就施行故  
此復何義以起無損害心根本業道攝取上  
上勝行是故不轉離根本業道修行施等行  
一切處不退以是義故名爲不轉又言行菩  
薩行時降伏一切諸魔怨敵者以善知迴向  
方便心成就故此明何義略說四魔謂煩惱  
魔陰魔死魔及以天魔唯煩惱魔以爲根本  
依煩惱魔有餘三魔何以故以諸凡夫煩惱  
纏心依此煩惱所纏之心樂於世間求彼處  
樂布施等法迴向天道以此義故爲彼陰魔

死魔所縛繫屬天魔是故菩薩斷身見等一切煩惱復能遠離不活等畏捨自身樂爲欲利益諸衆生故修習慈悲布施等行善根功德皆悉迴向薩婆若智遠離一切諸魔惡道是故名爲行菩薩行時降伏一切諸魔怨敵又言於諸世間心不疲倦者以大慈大悲心成就故此明何義以諸菩薩摩訶薩常爲世間一切衆生愚箭所射心受苦惱以大慈大悲心成就故見衆生利即是已利是故大慈大悲心生則能利益一切衆生是故名爲於諸世間心不疲倦又言如實知一切法自體相者以方便成就故此明何義以知諸法自

相同相故。此復何義。以諸菩薩善知世諦。善知第一義諦。方便是故。不著有無二邊。此明何義。菩薩雖見識境界事。而先已觀察識境界事。何以故。以常不捨第一義諦。深心力故。是故不隨著有邊見。雖常不捨第一義諦。而常善知世諦之事。何以故。以常明見諸有爲行。不捨世間心念言說。故是故不墮著有無邊見。以能善知此二種義。是故名爲如實知一切法自體相。又言以心不疲倦。故不依他智。速疾成就阿耨多羅三藐三菩提者。以般若波羅蜜成就。故此明何義。以諸菩薩摩訶薩。般若觀察有爲法。故此復何義。菩薩觀察諸

有爲行無人無衆生無主無自在迭共相因  
增長有力依於本業造一切業猶如幻師所  
作幻人往來跳躑種種伎術無疲倦者是故  
名爲以心不疲倦故又心不疲倦者以離衆  
生相故此明何義有爲諸行一切無實唯有  
種種諸業使行他力相依故能成就有爲諸  
行是故菩薩知有爲法實無神我而不依他  
智隨所修行皆以毗離耶波羅蜜增長成辦  
速疾成就阿耨多羅三藐三菩提以諸菩薩  
摩訶薩求薩婆若示現遠離無因顛倒因隨  
順正因果是故如來說此脩多羅  
問曰復以何義如來說此脩多羅答曰依不

定聚菩薩求定聚故成就何等行得入正定  
聚示現彼菩薩入正定聚修正因行是故如  
來說此修多羅此義云何菩薩未證初地正  
位雖無量劫修習善根而未能得不退轉位  
未得畢竟無怖畏處心未安隱常爲世間苦  
惱所逼未得菩提心根本慈悲心力未得增  
上力故以世間道智觀察十二因緣如實觀  
有爲行以依世間道觀寂靜法界求大涅槃  
無方便智故墮聲聞辟支佛地若墮聲聞辟  
支佛地有三種失何等爲三一者退失一切  
大乘善根種子二者退失能與一切衆生樂  
因三者退失薩婆若智以是義故如來經中

說言迦葉譬如一切世間天人雖復修治偽  
瑠璃珠而彼偽珠終不能作真瑠璃寶如是  
迦葉一切聲聞修戒定慧及頭陀等一切功  
德終不能得坐於道場成阿耨多羅三藐三  
菩提迦葉譬如修治大毗瑠璃隨意能得無  
量百千萬億珍寶如是迦葉修菩薩行故能  
出生一切聲聞辟支佛等及以天人依此義  
故如來寶積經中說菩薩有四種非善知識  
何等爲四一者求聲聞人但欲自度二者求  
緣覺人喜樂小事三者讀外經典路伽耶等  
四者習學一切文辭嚴飾所有親近此四種  
者但增世利不增法利

復有經中大德迦葉白文殊師利有五逆人  
能發阿耨多羅三藐三菩提心修諸功德證  
大菩提而羅漢不能譬如根敗之人於五欲  
境界無所能爲無所增益如是聲聞辟支佛  
人離諸結使於一切佛法無所能爲無所增  
益無如是觀察佛法力是故文殊師利一切  
凡夫報如來息非聲聞也何以故凡夫之人  
聞佛功德爲不斷絕三寶種故能發阿耨多  
羅三藐三菩提心聲聞之人雖復終身聞諸  
佛法十力四無畏等而不能發阿耨多羅三  
藐三菩提心又般若波羅蜜經中說諸天子  
未發阿耨多羅三藐三菩提心者彼人應發

大菩提心已入聲聞辟支佛位不能復發阿  
耨多羅三藐三菩提心何以故一切聲聞辟  
支佛等斷生死流不能數數受生世間發阿  
耨多羅三藐三菩提心諸菩薩摩訶薩於初  
地中見實諦故發阿耨多羅三藐三菩提心  
不失因故攝得深心以般若波羅蜜如實攝  
取修戒行等不著身命唯為利益衆生修行  
彼時名為不退轉菩薩應知是故如來十地  
修多羅中說菩薩生如是心即時過凡夫地  
入菩薩位生在佛家種姓尊貴無可譏嫌過  
一切世間道善住菩薩法中善住菩薩正處  
入三世平等真如法中如來種中畢定究竟

阿耨多羅三藐三菩提菩薩住如是法名住  
菩薩歡喜地以不動法故過五怖畏所謂不  
活畏惡名畏死畏墮惡道畏大衆威德畏彼  
皆遠離何以故是諸菩薩離我等相故過凡  
夫地者彼過有九種應知入菩薩位者位過  
初成出世間心如始住胎相似法故生在佛  
家者家過以依方便般若生家生相似法故  
種姓尊貴無可譏嫌者種姓過以大乘行生  
子相似法故過一切世間道者出過以世間  
道不能攝取出道生相似法故入出世間道  
者入過以出世間道攝取入道生相似法故  
善住菩薩法中者身過以大悲爲體於作他

事即是已事自身體相似法故善住菩薩正  
處者處過不捨世間方便不染善巧正住生  
住處相似法故入三世平等真如法中者業過  
順空聖智生命相似法故如來種中畢定究  
竟阿耨多羅三藐三菩提者畢竟過佛種不  
斷究竟涅槃道成就相似法故如是示現凡  
夫生菩薩出入胎不相似以有染無染故如  
是次第家不相似種姓不相似出不相似入  
不相似身不相似處不相似生業不相似成  
就不相似如是尊者婆藪槃豆說畢竟成就  
心有餘論師更異法釋偈言

菩薩摩訶薩似生何等心見世間虛妄佛說彼初

此明何義見世間虛妄者以一切世間唯因緣生無有實體如尊者龍樹菩薩偈說

因緣和合生 彼法無實體 若無實體者 云何名有法

聖者無盡意菩薩摩訶薩無盡經中說觀察因緣方便智知一切法依因緣和合而生若一切法依因緣依和合生彼法不依我人衆生壽命若法非我非人壽命彼法不可數爲過去現在未來菩薩若能如是觀察是名菩薩摩訶薩觀察因緣和合方便智不依我者此義云何以依種種因緣法生不依我生以無實我體故如衆緣生火火體有熱熱無實體而因緣和合名火有熱如是不離身

根知外更有實我以無實體故無實體者為  
同虛空為同有為若同虛空即是無物若同  
有為即是無常我人眾生壽命等者為可化  
眾生種種名說非有實我又如經中大海慧  
菩薩為聖者大悲思梵說成就一切佛法問  
答品中偈言

諸法因緣生 彼法無實體 法若實無體 彼法實不生  
菩薩知眾生 如是無實際 依彼實際智 知諸法虛實  
以是義故菩薩知一切法因緣和合而生眾  
生無其實體若如是者一切世間心識皆是  
虛妄分別彼菩薩心於一切法實際平等無  
礙智行即是初心是故名為初發阿耨多羅

三藐三菩提心是故偈言

彼不見凡地 以彼體空故 是故諸佛說 過彼凡夫地

遠離聖人法 染著身見等 住五欲資生 故名凡夫人

此明何義地者彼處生凡夫人是名凡夫地

此是三界中煩惱所縛處依止煩惱生是名

凡夫地是故彼初心見三界皆空不起一法

相以其不起一法相故則不願樂一切處生

除慈悲心為欲教化諸衆生故而常觀察寂

靜法體以是義故說彼菩薩過凡夫地是故

偈言

法體無故空 空故無所作 離一切相故 智者無所求

入菩薩位者偈言

即空名菩提。佛說煩惱病。隨辟支佛地。及取聲聞位。即空名菩提者。如實覺知衆生虛妄。名爲菩提。提是故。聖者無盡意菩薩。四念處說諸菩薩。摩訶薩修法觀時。若見一切法離空無相無願無行無生無起及離十二因緣者。不名如實覺。若不見少法離空無相無願無作無生無起及離十二因緣菩薩。若能如是覺知一切衆生無其實體。是名如實覺。是故偈言。即空名菩提。故名初地菩薩。覺知一切諸衆生。空棄捨利益。一切衆生而取聲聞辟支佛位。是則名爲初地菩薩。所治煩惱。是故偈言。佛說煩惱病。墮辟支佛地。及取聲聞位。故又復。

偈言

知空離二邊。無二染涅槃。以無涅槃染。佛說菩薩位。  
知空離二邊者。此義云何。如如來法印經中。  
說舍利弗言。無老別法者。即名爲空。舍利弗。  
言世尊所言空者。此言何謂。佛告舍利弗。所。  
言空者。非可說。非不可說。若非可說。非不可。  
說。彼不可表。若不可表。彼非世間。非出世間。  
以非世間。非出世間。故說名爲空。若能如是。  
了知空者。名離二邊。菩薩若離彼二邊者。不。  
墮煩惱。不取聲聞。辟支佛等二種涅槃。佛說。  
煩惱病者。取異地相。故取異地相者。謂取聲。  
聞。辟支佛等異地相。故亦名棄捨利益衆生。

以取無爲涅槃樂故。又以妨於佛菩提故。復有異義。無煩惱病者。離煩惱病故。以其不取二乘涅槃。依本願力。不捨利益諸衆生故。若如是者。無二乘病。無煩惱病。如是修行一切法空。是名諸菩薩摩訶薩。入菩薩位。以能遠離一切煩惱。遠離一切對治法故。如是菩薩以無二行。依本願力。不捨利益諸衆生故。不墮聲聞辟支佛地。不爲世間煩惱所染。此是菩薩摩訶薩等最難勝事。以雖不見一切衆生。而爲衆生修行。如是之事。不可思議。一切世間不能覺知。第一希有一切聲聞辟支佛等所不能見。以此義故。龍樹菩薩摩訶

薩集菩提功德論中說偈言

此最希有事第一不思議 菩薩爲修行而不見衆生  
如來亦說爲欲讚歎諸菩薩摩訶薩如實希  
有功德如經中說菩薩摩訶薩有四種真實  
功德何等爲四一者能信解空亦信因果二  
者知一切法無有吾我而於衆生起大悲心  
三者深樂涅槃而遊生死四者所作施行皆  
爲衆生不求果報若如是者即生在佛家是  
故偈言

菩薩摩訶薩

以離諸煩惱

則證菩薩位

是故生佛家

此明何義又佛家者行何等法生如來家謂  
離煩惱故解空行故知自位故又作利益衆

生行故不迷失行故得如是法名爲菩薩摩訶薩生在佛家此明何義偈言

佛說如來家 謂方便般若 菩薩生是家 是故不可嫌

此義云何言方便者略說不捨一切衆生言般若者所謂不取一切諸法此二種法是諸佛家是故菩薩摩訶薩依方便般若生以爲

方便般若二法之所攝故菩薩摩訶薩爲欲利益一切衆生生在世間而實不依煩惱業生若如是者菩薩摩訶薩不可譏嫌一切天等可訶之法皆悉遠離生佛勝家以是義故種姓尊貴不可譏謙是故如來修多羅中爲婆羅門而說偈言

天人輒闥婆 龍夜叉衆鳥 如是等諸業 皆悉已滅盡  
彼漏散滅盡 如蓮華不染 若能如是知 不染著諸欲  
如是菩薩摩訶薩 是名眞佛子 非天等異子  
是故偈言

菩薩知實際 及修波羅蜜 以得無漏道 故出過世間  
菩薩知實際者 此明何義 明一切法皆悉寂  
靜 是故如來而說偈言

一切法無體 以實無諸事 不生不滅 故得名爲實際

如是般若波羅蜜 知一切諸法無體 眞實際  
以般若波羅蜜 知斷道行 五波羅蜜 知方便  
功德道 如是菩薩摩訶薩 以此功德智慧 能  
成佛菩提 能盡諸煩惱 能利益衆生 又修諸

波羅蜜亦知如實際云何知不見施者受者財物三種法故修行清淨諸波羅蜜菩薩如是修行實際是故無漏以無漏故出過一切諸世間道是故偈言

分別世間行煩惱稠林中 取出世間位是入出世道  
分別世間行者略有二種分別一者實分別  
謂色是可見相如是等二者勝分別即彼色  
中青黃赤白等世間者即五陰煩惱稠林者  
深險黑闇恐怖可畏不可觀察難見難知如  
是菩薩摩訶薩觀察自體分別勝分別五陰  
分別如向所說事中不著作是思惟我當云  
何令衆生解是故偈言

如實知諸法。實勝陰一二。不見衆生事。云何化衆生。  
菩薩摩訶薩。修行無漏智。及以功德行。趣於出世道。  
是故菩薩入出世間道。問曰云何善住菩薩。  
法中答曰偈言。

入菩薩諸地。

安住已法中。

依通及自在。化一切衆生。

入菩薩諸地者。如下經言。善知地地轉行。故  
化一切衆生者。如下經言。得百三昧。乃至無  
量百千萬億那由他劫。不可數知。故得自在。  
者。如說種種功德。何等時。何等法。何等自在。  
何等成就事。何等行。得諸自在。不退一切佛  
法種子。義成就一切佛法。故言善住菩薩法。  
中問曰云何善住菩薩。正處答曰偈言。

一時諸佛邊聞持思修說行解義成就正覺供養等  
菩薩摩訶薩修行如是法是名為安住菩薩正處中  
是故經言善住菩薩正處問曰云何入三世  
平等真如法中答曰偈言

知諸佛菩提及佛菩薩行知佛三世空是名善意入  
此義云何謂知一切三世諸佛法身平等又  
復能知一切諸佛依色身故修行一切佛菩  
薩行及知一切過去未來現在諸法皆從因  
緣和合而生無其實體善意入者如向所說  
三世諸法平等無二如實而知一味等味不  
破壞入是故經言入三世平等真如法中間  
曰云何如來種中畢定究竟阿耨多羅三藐

三菩提答曰偈言

菩薩淨煩惱 及淨衆生心 具足大慈悲 畢定成菩提

菩薩淨煩惱者此義云何以初地所治身見等煩惱於見道時中皆悉遠離故彼見道中遠離煩惱如向所說見一切法三世平等如實中說及淨衆生心者如下經言於一念頃

教化百衆生乃至若以願力自在勝上如是等依教化力清淨諸煩惱故得故下經言是故我當先住善法亦令他人住於善法何以故若人自不行善不具善行爲他說法令住善法無有是處以得大慈大悲心故是故上經言是心以大悲爲首是故菩薩自淨煩惱

淨衆生心具大慈悲名爲畢竟得阿耨多羅三藐三菩提以畢定進趣大菩提故偈言

佛子金剛藏 說十法初心 即名佛菩提畢成佛道故

此義云何以聖者金剛藏菩薩摩訶薩說此十種法爲菩薩初地無漏菩提心即此十種心名爲佛菩提故言畢竟阿耨多羅三藐三菩提又偈言

譬如好種子 能生莖葉等 如是菩提心 不異諸佛法

此義云何以初證法心於一切佛法以爲種子以初地法與一切佛法以爲因故又偈言初地心增長 佛說爲諸地 最妙勝菩薩 說初月爲喻 此明何義如文殊師利問菩提經中說偈言

譬如月初生增長即滿月。如是歡喜地增長即是佛。如是十句義餘論師異釋應知是故如來爲不定聚菩薩求定聚故說此修多羅。問曰以何義故名不退轉。答曰以諸菩薩證得初地畢定因故。乃至未得成佛以來常以深心如實修行次第增長菩提之心。彼所治法不能鄣故。名不退轉。問曰復以何義名不退轉。阿耨多羅三藐三菩提。答曰以得成就不退轉因。謂深心等八種法。故又不退轉。心相違之法身見貪等一切煩惱。以見道力悉遠離。故又身見等一切煩惱無始世來隨無習生。不能遠離。取我樂等因離方便般若爲

諸世間苦惱所逼棄捨利益一切衆生取於  
涅槃是故菩薩得慈悲深心遠離取著我樂  
等因有方便般若雖爲世間苦惱所逼而不  
放捨利益衆生所作之事斷身見等煩惱根  
本彼時得不退轉阿耨多羅三藐三菩提是故  
聖者無盡意說言彼心離一切煩惱生如是等  
問曰若離身見等煩惱名不退轉因者菩薩  
及須陀洹俱離身見等煩惱何故菩薩不退  
轉阿耨多羅三藐三菩提而須陀洹等退轉  
答曰以心行差別故此明何義菩薩聲聞發  
心以來心行等相一切差別故云何差別聲  
聞之人不能修學利益他因是故棄捨利益

衆生自求涅槃見三界中貪等煩惱火之所  
燒無常所逼厭離三界如身衣火燃觀無常  
等五陰有爲行乃至離三結然後餘貪等煩  
惱漸漸微薄出過三界菩薩之人得深心故  
常樂利益一切世間爲諸衆生作利益行雖  
爲世間苦惱所逼以成就方便智慧力故雖  
能如實修行聲聞道而不證聲聞道以先斷  
所鄣取聲聞位法故何者是取聲聞位法謂  
捨大悲心不能增長大悲等行若諸菩薩得  
深心等修行菩提心眷屬等法能作證菩提  
位因彼時菩薩見一切法故能增長菩提心  
力方便推求利益一切衆生之事彼時即見

如實法界見法界故即時遠離見道所治一切煩惱即得畢竟大菩提心如十地經說菩薩摩訶薩生如是心是心以大悲爲首如是等彼菩薩如是證見道已方便推求利益一切諸衆生因善學大悲深心等法離我樂等不爲煩惱火之所燒因不相似故菩薩摩訶薩常以深心爲利益他而修行故即見道時斷三界中一切煩惱而聲聞等先不修集慈悲方便是故無有利益他行漸斷煩惱後得羅漢以是義故大海慧菩薩經中說菩薩先已修集善根相應煩惱所謂大悲波羅蜜等此諸善法名爲煩惱非餘煩惱依彼煩惱爲

化衆生住於世間以其所求未究竟故以是  
義故雖復俱離彼身見等一切煩惱而菩薩  
不退轉阿耨多羅三藐三菩提聲聞退轉如  
阿耨大池聖者龍王經中佛告龍王菩薩摩  
訶薩所證之位是出世間法而不離世間龍  
王有方便般若聖智三昧是名菩薩摩訶薩  
出世間位龍王譬如聲聞入聲聞位名須陀  
洹不墮惡道龍王菩薩亦入菩薩位名爲  
不退轉菩薩不墮惡道龍王聲聞之人不斷  
煩惱取聲聞位以其未過不自在法得初果  
故龍王菩薩摩訶薩過聲聞位證菩薩位是  
故不取聲聞小果乃取道場大菩提果以是

義故聲聞有量菩薩無量龍王如有二人俱  
墮高山其一人者勇健多力先已習學種種  
伎能以方便智還上山頂其第二人身力微  
少先不習學種種伎能無方便智墮彼山下  
不能還上龍王如是菩薩摩訶薩觀察一切  
法空無相無願無爲依般若力觀察衆生住  
於一切種智山頂復有經說大德須菩提菩  
薩摩訶薩斷身見等無量煩惱而不取彼聲  
聞小果乃取諸佛大菩提果觀察一切佛法  
以大慈悲心憐愍一切衆生修菩薩行斷身  
見等一切煩惱是故不取聲聞小果乃取諸  
佛大菩提果須菩提白文殊師利言文殊師

利此事希有此大方便菩薩之人斷身見等  
一切煩惱而能不取聲聞小果文殊師利言  
大德須菩提菩薩摩訶薩有大方便所攝智  
性是故菩薩雖如實知彼身見等一切煩惱  
而能不取聲聞小果大德須菩提如大力士  
持薄利刀斬斷娑羅樹彼娑羅樹即住不倒  
大德須菩提菩薩摩訶薩亦復如是有大方  
便般若智性是故菩薩斷身見等一切煩惱  
而能不取聲聞小果大德須菩提彼娑羅樹  
復於異時值天雨潤即便還生枝葉華菓具  
足如本衆生受用大德須菩提菩薩摩訶薩  
亦復如是得大慈悲心雨所潤雖斷身見等

諸煩惱還入三界方便示現生世間家隨順  
一切衆生受用大德須菩提復於後時彼娑  
羅樹大風吹動即便倒地更不復生大德須  
菩提菩薩摩訶薩亦復如是爲大智慧猛風  
所吹在道場地永滅不生是故菩薩摩訶薩  
發心已來一切心行不同聲聞辟支佛等以  
諸菩薩摩訶薩心行等法本來不同故若一  
切同者應聲聞作菩薩菩薩作聲聞問曰如  
聲聞人先斷見道煩惱然後漸斷修道煩惱  
菩薩何故不同聲聞先斷見道煩惱然後乃  
斷修道煩惱又問如菩薩取無量世住修集無  
量善根須陀洹等何故不取無量世住亦不修集

無量善根。答曰：須陀洹等常有樂，斷煩惱心。故以得無漏對治，明故轉轉怖畏諸世間。故生如是心，何時當得離一切苦，入無餘涅槃界。故修道中，餘殘煩惱自然漸盡，以是義故，聲聞不取無量世住，亦不修集無量善根。菩薩之人，無量世來為諸眾生作利益，因為諸眾生作利益事，得如是等畢竟之心，復見真如甘露法界，觀察一切諸眾生身而實不異。我所求處是故，菩薩見修道中一切煩惱能。鄣利益眾生行，故即見道中一切俱斷。又以觀察利益一切諸眾生樂勝涅槃樂，是故菩薩取無量世住於世間，修一切行，謂薩婆若。

智故能明見修集無量菩提善根得大菩提  
利是故修集無量善根

問曰菩薩若見修道煩惱能鄣利益諸衆生  
行以是義故於見道中即斷除者以何義故  
即見道中不以世間智伏修道煩惱答曰遠  
離一切煩惱名不退轉因若離無漏道見法  
離無漏道斷一切煩惱者可如是難何故世  
間道不伏修道煩惱若世間道同世間道無  
如是力是故不得言不退轉而此菩薩即見  
道時永斷一切所治之法得大悲等生畢竟  
菩提心名不退轉菩薩應知是故菩薩如實  
見法成就方便不取聲聞辟支佛地如實知

見一切世間種種過患。爲欲利益一切衆生。行世間行。不捨世間。不爲世間過患所染。是故聖者文殊師利告天子言。諸天子。菩薩摩訶薩。不住有爲。不住無爲。是故菩薩名爲福田。何以故。菩薩離有爲法。不住無爲法。知有爲有過。知無爲無過。知一切過。故不住有爲。知無爲法。不住無爲。爲諸天子。如大力士仰射虛空。而彼射箭於虛空中。無所依住。而不墮地。諸天子。此事爲難。更有難者。天子白文殊師利言。如是之事。希有最難。更無難者。文殊師利告天子言。菩薩摩訶薩所作難事。復過於此。以菩薩摩訶薩。不捨有爲。而證無爲。不

墮有爲而能教化墮有爲者

問曰畢竟定者如來經說若畢竟定聲聞之人遠離三結得須陀洹不墮惡道人天七反永離諸苦畢竟證得阿羅漢道菩薩亦亦斷三結等以何義故不同聲聞而無量世住答曰此義不然何以故言畢竟定者依聲聞乘修多羅說菩薩摩訶薩依無量行依求一切種智清淨出世間道能淨薩婆若大乘修多羅中說以是義故菩薩攝取無量世住問曰此義不然何以故若初地菩薩摩訶薩遠離一切對治之法得畢竟不退轉阿耨多羅三藐三菩提者以何義故文殊師利問菩

提經中說初發心能過聲聞地第二行發心  
能過辟支佛地第三不退發心過不定地第  
四一生補處發心安住定地答曰彼經中依  
證勝進地依遠中遠離所治法依上上地說  
過不定地是故此說不違彼經此義云何如  
初禪對治法此明何義如小乘人未來禪中  
斷不定因欲界修道煩惱乃至第四禪中亦  
說斷修道煩惱以遠中遠勝對治法而不相  
違何以故以對治因等故菩薩摩訶薩亦復  
如是於初地中斷菩提心相違退因謂身見  
等一切煩惱以得成就深心等修行畢竟遠  
離退菩提心因故乃至八地中得勝進遠中

遠勝對治法名爲過不定地安住定地以對  
治法等故以定因故言過不定地義不相違  
又言過不定地者求佛菩提大涅槃心未斷  
絕故所起諸行功用疲倦名不定因是故八  
地以上始言過不定地此義云何如彼處過  
苦等此明何義如小乘中厭過欲界苦雖厭  
過欲界苦而初禪地未過識等苦因以未過  
所治法是故如來經中說第二禪中過苦如  
經中說憂根何處滅佛言初禪中滅又問苦  
根何處滅佛言二禪中滅又問喜根何處滅  
佛言三禪中滅又問樂根何處滅佛言四禪  
中滅如是過一切色相等厭初禪時即過一

切色等諸相而第四禪中厭過因故說第四  
禪過菩薩摩訶薩亦復如是於初地中已過  
不定地二地已上乃至七地以來求佛菩提  
大涅槃心未斷絕故所起因行疲倦功用名  
不定地是故爲彼未滿足心不定因故八地  
中說過不定地言不相違又得畢竟菩提心  
因緣具足和合故言初發心過聲聞地如法  
印經中如來說言彌勒發菩提心有七種因  
何等爲七一者諸佛教化發菩提心二者見  
法欲滅發菩提心三者於諸衆生起大慈悲  
發菩提心四者菩薩教化發菩提心五者因  
布施故發菩提心六者學他發菩提心七者

聞說如來三十二相八十種好發菩提心  
勒諸佛教化發菩提心見法欲滅發菩提心  
於諸衆生起大慈悲發菩提心此三發心能  
護正法速疾成就阿耨多羅三藐三菩提餘  
四發心非真菩薩不能護持諸佛正法速疾  
成就阿耨多羅三藐三菩提此明何義若菩  
薩成就深心畢竟不退得大悲心大勇猛力  
爲諸世間一切衆生愚箭所射而觀衆生起  
大慈悲攝諸善根聚集增長故言初發心時  
過聲聞地第二發心過辟支佛地者辟支佛  
人勝聲聞人畢竟不爲他身畢竟自爲身求  
寂滅涅槃若菩薩初觀察法性上上觀無生

法忍時未得過不定道所有生心皆悉能過  
聲聞辟支佛地故言第二發心過辟支佛地  
第三發心過不定地者於初地中離不定因  
得定因故所有生心過不定地故言第三發  
心過不定地第四發心安住定地者二地已  
上遠離一切所治之法是故安住畢竟定地  
故言第四發心安住定地  
又不退轉阿耨多羅三藐三菩提者所謂菩  
薩得離發菩提心相違法時名不退轉菩薩  
如寶女經中說寶女菩薩摩訶薩有三十二  
罌礙漸路發菩提心相違之法何等三十二  
一者求聲聞乘二者求辟支佛果三者求釋

梵處四者猗著所生淨修梵行五者專一德  
本言是我所六者若得財寶慳貪愛恠七者  
以偏黨心而施衆生八者輕易誡禁九者不  
念道心專精之行十者瞋恚之事以爲名聞  
十一者其心發逸十二者馳騁十三者不求  
博聞十四者不察所造十五者貢高自大十  
六者不能清淨身口心行十七者不護正法  
十八者背捨師恩十九者不棄捨恩二十者  
離堅要法二十一者習諸惡友二十二者隨  
諸陰種二十三者不勤助道二十四者念不  
善本二十五者所發道意無權方便二十六  
者不以懇懃咨嗟三寶二十七者憎諸菩薩

二十八者所未聞法聞之誹謗二十九者不覺事三十者習持俗典三十一者不肯勸化衆生類三十二者馱於生死又復所以不退不轉以諸菩薩畢竟受持不退轉法故如娑伽羅龍王經中說龍王菩薩摩訶薩畢竟成就八種法故得名爲入不退不轉菩薩之數何等爲八所謂如說修行一者觀察自過不觀他過二者乃至不爲自身命故施惡於人三者若得利養其心不高若失利養心亦不下四者於諸衆生起福田想不生惡心五者所有財物悉與一切衆生共之六者於諸法中不欲獨解令他不知七者見他得樂生歡

喜心不由自樂生歡喜心八者於愛不愛其  
心平等菩薩具此八種法故不退不轉阿耨  
多羅三藐三菩提

問曰應說不轉相云何不轉相荅曰我正欲  
說而汝復問菩薩成就不轉相者如來處處  
修多羅中廣說應知如智印三昧修多羅中  
說言彌勒有五種法名爲菩薩畢竟不轉阿  
耨多羅三藐三菩提相何等爲五一者於諸  
衆生起平等心二者於他利養不生嫉心三  
者乃至自爲身命不說法師比丘諸惡過失  
四者終不貪著供養恭敬讚歎等事五者畢  
竟得甚深法智忍彌勒更有五法故得名爲

不轉菩薩何等爲五一者不見自身二者不  
見他身三者心不分別妄說法界四者不見  
菩提五者不以相見如來如是等又般若波  
羅蜜經中廣說不轉之相如彼經說應知  
問曰云何得異法菩提心不退轉菩提心因  
於異佛菩提名不退轉阿耨多羅三藐三菩  
提心答曰以得決定因故此明何義以初地  
菩薩成就畢竟因以依此因畢竟證大菩提  
是故言得不退轉阿耨多羅三藐三菩提言  
阿耨多羅者謂勝一切有爲法故言三藐三  
菩提者謂離一切諸不善法煩惱習氣故於  
一切處無障礙故一切種一切法如實正知

故是故言三藐三菩提

問曰應說不退不轉功德云何不退不轉功德  
答曰不退不轉功德者如來處處經中廣  
說應知如十地經說諸佛子若有衆生厚集  
善根故善集諸善行故善集諸功德行故善  
供養諸佛故善集清白法故善知識善護故  
善清淨心故入深廣心故畢竟信樂大法故  
現大慈悲故如是衆生乃能發阿耨多羅三  
藐三菩提心厚集善根者菩薩從初發心已  
來能過聲聞辟支佛性是故能與不退不轉  
菩薩之位以爲種子貪等善根非正種子久  
修無量諸功德行故言厚集善根故善集諸

善行者菩薩正修諸行名修諸善行行修生  
起名異義一又言行者清淨身口意業正命  
自活以諸菩薩離損害心爲起成就利益一  
切諸衆生行一切聲聞辟支佛等不能得渡  
智慧大海而菩薩能渡故言善集諸善行故  
善集諸功德者以布施忍辱不放逸等四攝  
四家化衆生因諸法種子增長正集故言善  
集諸功德故善供養諸佛者爲增長他利益  
因力即是已事正快無量種種供養種種恭  
敬聞正法等生生供養恭敬諸佛故言善供  
養諸佛故善集清白法者以諸菩薩無量門  
集布施等行修諸白法爲取大菩提成就一

味心正迴向故能成就不退轉法故言善集  
清白法故善知識善護者唯佛如來爲善知  
識能護菩薩令發心增長安任不退不轉法  
中故言善知識善護故善清淨心者以不求  
自樂專一味心爲他利益長夜不爲自愛等  
門煩惱所染故言善清淨心故入深廣心者  
大乘法中專念廣勝畢竟因成就故言入深  
廣心故畢竟信樂大法者以起大心不怯弱  
故不畏世間一切諸苦見求小乘諸衆生等  
起大悲心欲與一切衆生樂故知一切種智  
處以方便力令衆生得故言畢竟信樂大法  
故現大慈悲者以見生死種種諸苦逼惱衆

生無舍無洲無有救者爲彼衆生滅諸苦惱  
行捨大捨極難捨等以方便力入大苦中故  
現慈悲又言慈者初發心菩薩以少力故但  
願憐愍一切衆生是故名慈又言悲者如是  
如是爲於一切衆生修行如是如是於勝法  
中起上上心是故名悲故言現大慈悲故又  
不退轉者菩薩摩訶薩有八種法能成不退  
轉地何等爲八一者大悲二者心安任三者  
智慧四者方便五者不放逸六者發精進七  
者善住念八者值善知識初發心菩薩應  
速修行此八種法如救頭然後方修集菩薩  
其餘不退轉法依此八法修集其餘不退不

轉一切功德彼不退轉一切功德處處經中  
廣說應知

問曰但說不退阿耨多羅三藐三菩提便足  
何故復言不轉以得不退者即是不轉故答  
曰以得不退因畢竟成就深心故名不退言  
不轉者依不退深心起餘心行上上勝進故  
名不轉

問曰若尔不退不轉更無異義云何不轉於  
不退爲勝答曰言不退者依不損害心根本  
業道起利益他行證上上勝義故言不轉者  
修行成故又不退者永斷一切得勝法障身  
見等煩惱根本盡故言不轉者於修道中斷

滅根本無明故又不退者善集具足功德故  
言不轉者善集具足智慧故又不退者成就  
方便故言不轉者成就般若故又不退者過  
聲聞辟支佛地因故言不轉者善集得菩提  
諸善根故又不退者成就大力故言不轉者  
成就修行故又不退者具足成就十力因故  
言不轉者具足成就四無畏因故又不退者  
依檀等白法爲利益衆生故言不轉者檀等  
善根爲衆生故迴向大菩提常樂利益諸衆  
生故又不退者以得初地不失菩提心因深  
心等成就故言不轉者二地已上起心十善  
業道所攝異十善業道修行檀等數數增長

故問曰勝進法者其義云何

答曰以諸菩薩心行增長於先所得白淨法  
中上上勝進以是義故名勝進法降伏一切  
諸魔怨敵者以降伏魔降伏怨降伏敵對是  
故說言降伏一切諸魔怨敵此義云何菩薩  
降伏煩惱魔故天魔伺求不得少過故言降  
伏一切諸魔以得聞思修慧力故利益衆生  
相違怨等所不能障故言降伏一切諸怨一  
切外道諸論師等不能折伏故言降伏一切  
敵對是故說言降伏一切諸魔怨敵又以般  
若力故斷煩惱魔故言降伏一切諸魔以方  
便力故能修集菩提善根過二乘所證涅槃

怨敵是故說言降伏一切諸魔怨敵又復成就  
深心等法過魔道因故言降伏一切諸魔求  
一切智地心未斷絕伏所敵對疲倦等法求  
一切智地心已斷絕伏所敵對疲倦等法故  
言降伏一切敵對又得菩薩十種自在故能  
降伏陰等四魔故言降伏一切諸魔以任正  
定聚過菩薩怨敵聲聞辟支佛地是故名爲  
降伏怨敵又能善知諸魔業事故言降伏一  
切諸魔得諸菩薩善淨諸業能過一切諸惡  
道因故言降伏一切怨敵又能善護所治等  
法諸魔怨敵是故名爲降伏一切諸魔怨敵  
如經中佛說龍王菩薩摩訶薩成就八法故

能降伏諸魔怨敵何等爲八所謂一者知五  
陰法如幻化故二者離身見等一切煩惱如實  
知空故三者如實知一切有爲行不生而生  
諸世間故四者常教化衆生常不捨離菩提  
心故五者心常堅固修行精進而常怖畏三  
界故六者入不應入者而常求上智爲衆生  
故七者常修集功德而信無常相故八者常  
修集智慧功德而不求聲聞辟支佛智故

問曰應說菩薩行云何菩薩行答曰菩薩行  
者菩薩深見世間過患涅槃利益發起智慧  
方便所攝大慈悲心常爲利益衆生修行是  
故名爲行菩薩行

如實知一切法自體相者知一切法如彼法  
相如實知故又自體相名爲相如彼一切法  
自體相相如是如實知

問曰應如是說知一切法相不應說知一切  
法自體相荅曰爲明可見能見法不二故是  
故說如實知一切法自體相此義云何爲明  
諸法自體相不離諸法更有相故問曰若介  
應如是說知諸法體不應說知相荅曰不然  
若如是說不離向所說過此明何義如諸法  
相離諸法更有體恐如是取爲護彼過故二  
種說此明何義即自體相離體更無相自體  
與相名異義一是故說如實知一切法自體

相不如向難所說

問曰何故名爲自體相答曰若如實知一切諸法因緣而有無實體相此明何義以諸菩薩隨順出世間智慧能如實知彼諸法體能如實知諸法體者以見一切有爲諸行依他因緣不常不斷以是義故不著斷常虛妄執著有無不二成就中道如實知見諸有爲行虛妄不實以得清淨心知有爲行虛妄分別故遠離破戒等垢因清淨戒具足乃至未成佛來修集善根與一切衆生樂因令得一切種智

弥勒菩薩所問經論卷第一

牛齒

詩下音

瑛

音濡

古作鞅

棄

俗作弊

毗祭惛

搃

俗惣

一作憂

感

下倉曆

音鞅

飭

音餽

識与同

徹聽

上

直反輻

音姝

尺朱反捷

省

音乞

瑕

加反

搥撲

上陟

木

反匿

力捷

省

音軋

逼

反彼

灑

反七

偏黨

儻

非馳

下騁

下怯

弱

下音

若反

怨敵

上音

寬的

下伺

相寺

下領

反怯

下音

若反

怨敵

上音

